

22 mas 2021

Chè fanmi,

Nou fèk reouvri bilding lekòl segondè pou aprantisaj anpèsòn pou premye fwa depi mwa novanm 2020, epi fòk mwen di lajwa sou figi elèv nou yo pandan y ap antre nan bilding lekòl yo te enkwayab. Nou kontan wè elèv tout laj ap aprann san danje nan salklas fizik yo.

Se poutèt sa mwen trè kontan fè w konnen tout fanmi adistans nou yo pral kounye a gen yon lòt opòtinite pou tranzisyon nan aprantisaj mikis ane lekòl sa a. Sa vle di si pitit ou a ap aprann kounye a adistans chak jou, yo pral kapab patisipe nan aprantisaj anpèsòn nan bilding lekòl la omwen yon pati nan semèn lan pou rès ane lekòl la. Nou pral fè tout efò pou bay otan jou aprantisaj anpèsòn posib.

Kilè ak kòman pou Opt In (antre) nan aprantisaj mikis

- Apati mèkredi 24 mas, ou ka ale nan Learning Preference Survey nan <https://www.nycenet.edu/surveys/learningpreference> pou chwazi aprantisaj mikis pou pitit ou a.
- Fanmi ka rele 311 tou.
- Ou ka change pou aprantisaj mikis jiska Mèkredi 7 avril.

Kilè pitit ou a ka retounen nan bilding lekòl la?

- Elèv nan distri 3-K, Pre-K, ak klas K-5, ladan elèv ki nan Distri 75, ki patisipe nan aprantisaj mikis pandan peryòd opt-in sa a pral retounen nan bilding yo nan mwa avril.
- Elèv ki nan klas 6-12 ki patisipe nan aprantisaj mikis pandan peryòd opt-in sa a ap retounen nan yon dat apre, epi n ap kominike plis detay pi vit posib.
- Yo pral afiche mizajou yo nan <https://www.schools.nyc.gov/coronavirus>.

Kondisyon pou retounen nan bilding lekòl la

Tanpri sonje si ou chwazi aprantisaj mikis pou pitit ou a, ou dwe soumèt fòm konsantman pou tès oaza COVID-19 nan premye jou pitit ou a kòmanse aprantisaj an pèsòn lan. Ou ka soumèt konsantman ou pou tès youn nan de fason:

- Atravè kont lekòl vil nouyòk (New York City Schools Account) ([NYCSA](#)) anba 'Manage Account', oswa
- Ranpli epi siyen fòm konsantman an ki disponib [la a](#) epi pote li nan lekòl pitit ou a nan premye jou li retounen nan bilding lekòl la.

Fanmi ki chwazi aprantisaj mikis yo dwe fè pitit yo ale anpèsòn nan jou yo pwograme pou ale yo.

Tanpri sonje ke si pitit ou a ap aprann kounye a konplètman adistans epi ou pa ranpli sondaj la ki mete yon preferans pou aprantisaj mikis, elèv ou a (yo) ap rete konplètman adistans.

Nou kapab ofri chans anplis sa a pou elèv ki konplètman adistans yo patisipe nan aprantisaj nan bilding paske Sant ameriken pou kontwòl ak prevansyon maladi (CDC) te mete konsèy li yo ajou, sa ki pèmèt nou akomode plis elèv nan yon salklas san danje. Kòm toujou, fokis nou se sou sante ak sekirite pitit ou yo, anplwaye devwe

ki sèvi yo, epi oumenm—fanmi yo. Sa te priyorite nou depi premye jou a, epi yo pral kontinye gide tout sa n ap fè.

Grasa pratik sante ak sekirite solid nou an—ki gen ladan mete mask, ijyèn men, tè s oaza chak semèn pou COVID-19, distans fizik, ak plis ankò—bilding lekòl nou yo pami kote ki pi an sekirite nan tout vil la.

Mèsi anpil, kòm dabitid, pou konfyans ou ak kolaborasyon w. Nou kontinye montre nasyon an sa ki posib konsènan edike yon milyon elèv nou yo san danje — epi nou pa t kapab fè sa san ou.

Mwen remèsye ou pou angajman ou, epi, an retou, mwen pwomèt ou angajman nou pou pitit ou a inebranlab.

Avèk senserite,



Meisha Porter
Chanselye Lekòl Vil Nouyòk